



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

Tir Yimyim

tiryimyim@aolima

tir yimyim

TAPAK 8

Maharashtra nung NCP lenir Ajit Pawar nem finance ministry agütsü

T. Lanu Imchen NESKF nung VP shim



VOL. XX NO. 272 (ADOK 272) DIMAPUR

KÜPTOKNÜ (SATURDAY)

CHITENI (JULY) 15, 2023

₹ 5.00

Manipur Naga kaketshirtemi UCC magizüker

Imphal, July 14, 2023 (Agencies): Naga lima nung Uniform Civil Code (UCC) magizüker ta All Naga Students' Association Manipur (ANSAM)-i metetdaksüogo.

ANSAM-i Law Commission of India Chairperson justice Ritu Awasthi dangi züluba shidi nung "UCC ya Indian Constitution indang secular tangatetba anema lir aser iba ajanga sensotemi nem tamangba yimsü temeten agüja aliba agientsü" ta shia lir.

"UCC ajanga Naga nung kin temeyoktep aliba nung tetsükdaksü bentsür arutsü kechiyong kin shia sobaliba, inyaksangshi aser ozüngtem balala lir" ta ANSAM-isa ashi.

"India nung tamangba yimsü aika lir aser pei pei sobaliba,

inyaksangshi aser ozüngtem lir. Saka Uniform Civil Code ajanga item ozüngtem melenshidang lendong bentsür arutsü" ta ANSAM-isa shidi nung shia lir.

"Nisung temeyoktep aliba linük ka nung ozüng ka dang masütsüla ta temaba jenjang nung mena alirtemi angatetsüla. Anungji Centre sorkar dang UCC tebilemba meyipa agitsü aser Naga nung tamangba yimsü aser sobaliba temeyoktep akhümsübutüsü ayongzük" ta parnokisa metetdaksü.

Manipur nung aliba Naga nung constituent units 16 tashi All Naga Students Association Manipur (ANSAM) nung dena lir aser parnoki Naga lima nung kodanga UCC magizüksü ta nenshia metetdaksüogo.

US Senate Committee-i Arunachal Pradesh metentsür

Washington DC, July 14, 2023 (Agencies): Arunachal Pradesh ya India nung tongtipang shilem ka ta United States Senate Foreign Relations Committee (SFRC)-i agizükogo.

SFRC-i bangzüng agizükba ajanga iba bangzüng ya Senate nung benoka agizüksü imlar.

Iba bangzüng ya Oregon nungi Senator Jeff Merkley aser Tennessee nungi Senator Bill Hagerty nati benok aser Texas Senator John Cornyn, Virginia Senator Tim Kaine aser Maryland Senator Chris Van Hollen nungeri agizük.

Iba bangzüng ajanga United States-i People's Republic of China (PRC) aser Indian state of Arunachal Pradesh tsüngda McMahon Line ya international boundary ta agizüka aliba nenshir.

China-i Arunachal Pradesh kübok tesem aika par meyong ta kuli agütsür saka US SFRC indang lemtet ajanga ibaji aitsür. "Committee-i iba bangzüng

agiba ajanga Arunachal Pradesh ya People's Republic of China nung masü saka Republic of India nung shilem ka ta akangshir. US-i kasa tangatetba aliba international partners den külemi iba tesem pusema nungittsü aser yaritsü nangzük" ta Senator Merkley-i ashi.

China-i Arunachal Pradesh dang Zangnan ta ajar aser iba tesem atema India o China tsüngda atsütepa arur. China-i Arunachal Pradesh ya South Tibet ta ashir saka ibaji Indian External Affairs Ministry-i aitsür aser India nung tongtipang shilem ka ta ashir.

United States-i 1962 nungi Arunachal Pradesh ya India nung shilem ka ta shia aruba ama US SFRC-ia maneni ibaji nangzükshio.

May 2020 nung Ladakh nung arrtsü mangatettep adokba mapang China-i Arunachal Pradesh nung tesem kar nunga melentsü merang saka ibaji White House-i magizük.

Wt. Omentula samar bushiba nguogo

Dimapur, July 14, 2023 (TYO): July 12, 2023 anepdang Dimapur kübok Darogapathar tesem nungi samar bushiba Wt. Omentula nguogo.

La ya Merangkongsür aser Tuli nung alir. Dimapur nung lar tanur kidang anir arua amongdang la yakünap süngo dang jemer ayazüka aoba samar bushitep tenzuka liasü.

La samaba osang social media sabang balala nung aser TV news channel nung belenshiba sülen Chümokedima aser ano New Chumukedima tsütsü la anguba osang angazüka liasü.

Yakünü nungi Dimapur Merangkong Senso Union-i anir telok balala aser temeimertemi la bushitepa aruba sülen Hokolbar nikongdang 3:30 ako meta New Chumukedima lushi nung la angu.

Tanü nikongdang arem-min nung Wt. Omentula anguba mapang la tashimeiti lulaa akümba dak alaka la temang nung zübo mesüra yiruyibongba kecha maliasü.

La ya amatari agi kanga bulua akümba nisung ka lir aser iba jagi lai len ayir senzü asütsü akok ta temulung melemi bilemer.

Governor La Ganesan-i Niuland district semdang

Dimapur, July 14, 2023 (TYO): Governor La Ganesan-i July 14, 2023 nü Niuland District semdang aser civil societies o heads of departments den senden ka amen.

Niuland district nung infrastructure aser tanga metokmeperitem lir saka sorkari item ajak koktettsü meranger. Niuland district office ajak nung nübo peria lezmüksütsü ta Governor Ganesan-i ashi.

Niuland-i Chumokedima, Wokha, Dimapur, Kohima, Tseminyu aser Assam den arrtsütepa lir aser item district ajak atema transport hub aser transit point ka akümsü lenmang lir ta paisa ashi.

Governor Ganesan-isa tawa tu Union Minister for Road Transport and Highways Nitin Gadkari dangi Nagaland Foothill road atema shidi ka züluba osang lemsatetp.

"Iba lenmang ajanga Nagaland kübok anüolen aliba district ajak sendakteptsü aser iba nung Niuland ya transit point tongtipang ka akümsü. NHIDCL ketdangsürtemi Botsa-Niuland-Bokajan road mapa junga inyakba shio" ta Governor-i metetdaksü.

Governor Ganesan-isa Ayushman Bharat, Pradhan Mantri Bima Yojana, Pradhan Mantri Suraksha Bima Yojana, Pradhan Mantri TB Mukta Bharat Abhiyan, Jal Jeevan Mission (JJM) aser Jan-Dhan Account amala centrally sponsored schemes indang olen kar lemsatetpa liasü.

Paisa department tem dang nübortem ajangzüksüsa central schemes takok ngua inyaksü ayongzük.

Nagaland nung school aser college ajaki New Education Policy (NEP) mapa küma inyaksüla ta Governor Ganesan-

isa shisem.

"Kütem süia arudang tayongzüba balala ajanga Nagaland-i terenlok wadang balala nung tanga state tem memenep lir. Nagaland nung alirtemi yimjung nung azüitsüla aser tanga state tem den jenjang kasa akümsü merangtsü ayongzük" ta paisa shisem.

Iba sentong nung Niuland DC Sara S Jamir-i tesentepertem pelaa agizük aser Western Sumi Hoho, Yimkhiung Arikaho Niuland District, Niuland District GBs Association o Niuland District Citizens Forum tirtemi o tatsütsü jembiba den Governor Ganesan nem memorandum ka agütsü.

Maneni, senden nung District Tuberculosis Officer, Executive Engineer of PWD (R&B), Executive Engineer PHED aser Lead Bank Manager nungeri presentations lemsatetp.

Judicial Commission kati Churachandpur semdang

Imphal, July 14, 2023 (Agencies): Gauhati High Court nung taoba Chief Justice Ajai Lamba-i anir züngsem aseme akümba Judicial Commission kati Manipur semdang.

May 3 nung tenzükba rongrong dak sendakba bushisüngdangtsü atema iba Commission nem tashi agüja lir.

Iba Commission nung retired bureaucrat Himanshu Shekhar Das aser taoba intelligence officer Prabhakar Aloka na dena lir.

Tanü parnok Churachandpur

nung aliba 36 Bn Assam Rifles camp atongba sülen Salt Brook School aser St. Mary's Higher Secondary School nung lapoka aliba relief camp ana nung jenoka alirtem den ajurutep.

Union Home Minister Amit Shah-i taoba mapang retired Chief Justice-level Judge ka lenisüba kübok Judicial Commission ka tentettsü osang sangokja liasü.

Amit Shah-i anogo pezü tashi Manipur semdangba sülen Governor Anusuiya Uikey aser Security Advisor Kuldiep Singh

na lenisüba kübok Peace Committee ka tentetba osang metetdaksü.

Home Minister Shah-isa Central Bureau of Investigation (CBI) nem ken o 6 bushisüngdang sudaktsütsü ashi.

Iba ajanga Centre-i ochi jungkai adoktsü aser aibelenertem merenshitsu nangzuka aliba sayur ta pai ashi.

Commission-i bushisüngdang asüba sülen tarutsü nung ibala mesükba mepetmesü madoktsü atema tebilembatem metetdaksütsü.

DoSE-i Teachers Attendance Monitoring System (TAMS) tenzük



July 14, 2023 nü Directorate nung Master Selfies aser authentication maparen inyakba angur.

Dimapur, July 14, 2023 (TYO): Department of School Education Nagaland-i Teachers Attendance Monitoring System (TAMS) ka yangludat.

Iba atema July 14, 2023 nü Directorate of School Education nung Principal Director, DoSE Thavaseelan K aser Mission Director, Samagra Shiksha Tamsunaro Aier nati anir staff ajak Master Selfies agiogo.

TAMS ya World Bank-i teyari agütsüba Nagaland Education Project - The Lighthouse (NECTAR) kübok inyaker.

Nagaland: Enhancing Classroom Teaching and Resources (NECTAR) ya state nung aliba school tem ketdangsüba tajungba akümsü atema lir aser TAMS ajanga iba alizüng tongtettsü.

TAMS ajanga school tesayurtem, lennirtem aser Department of School Education nung staff nem advanced software aser hardware tools agütsütsü aser iba ajanga daily employee attendance aser leave management maparen repringtsü.

TAMS ajanga reliable person

identification atema facial recognition technology amshitsü.

TAMS ajanga GPS, GMS, GHS aser GHSS nung inyaker ajak verification aser authentication asütsü aser proxy attendance samatsütsü.

Department of School Education ajanga state ajungalen department nung mapa inyaker ajak physical verification aser authentication drive inyakdar saka DoSE-i iba mapa ya Directorate of School Education nungi tenzüksü lemtetogo.

National Awards for Excellence in Journalism atema metetdaksür

Dimapur, Chiteni/July 14 (TYO): Print journalism indang tsünglanglen agüja aliba category tem nung National Awards atema India nunger journalists/freelancers/photojournalists tenüng meshir. Iba award nung kulzüng kaket den senpet sen dener alitsü.

Raja Ram Mohan Roy Award atema nomination/entries memeshir. Iba atema Jury Committee ajanga dang nomination shimtsü.

Iba award dak sendakba osang tejangja

mvw.nresscouitcil.nic.in nung angutsü.

Entries ajak Secretary, Press Council of India, Sochna Bhawan, 8- C.G.O. complex, Lodhi Road, New Delhi-110003 dangi zülutsüla aser scaled envelope nung Category of Award nomination indang jangja zülur inoktsüsüla aser envelope tema nung "CONFIDENTIAL" ta zülur August 18, 2023 nikongdang 5:00 ako tashinung tongtsüsüla. Advance soft copy tema secy-nci@nic.in dangi email sütettsü.

SN	Category	Cash Prize
1.	Raja Ram Mohan Roy Award*	Rs. 2,00,000/-
2.	Rural Journalism	Rs. 1,00,000/-
3.	Developmental Reporting	Rs. 1,00,000/-
4.	Photo Journalism: Single News Picture Photo Feature	Rs. 1,00,000/- Rs. 1,00,000/-
5.	Best Newspapers Art : Covering cartoons, caricatures and illustrations	Rs. 1,00,000/-
6.	Sports Reporting/Sports Photo Feature	Rs. 1,00,000/-
7.	Financial Reporting	Rs. 1,00,000/-
8.	Gender Issue Reporting	Rs. 1,00,000/-
9.	Reporting from Conflict Area	Rs. 1,00,000/-

Jalukie nung temesepba mozü atema consultation senden ka amen

Dimapur, Chiteni/July 14 (TYO): Peren district kübok Jalukie Sub-Division nung temesepba mozü achir aser yi ajemer tali küma aoba dak sendakba nung Additional Deputy Commissioner Jalukie T.L. Kiusumong Tikhir NCS-i ayongzüka July 13 nü ADC Office nung senden ka menogo.

Lokti nung timtem bener arutsüba iba timtem ya azüoktsü atema lenmang bushitsü asoshi lokti tentet balala lenirtem aser stakeholder tem nem shilem agidaktsüsü nükjidong nung iba senden ayongzüka mena liasü. Iba senden nung Peren Deputy Commissioner Vineet Kumar IAS-ia shilem agia lenmang balala sayua liasü.

Sentepa aliba lokti den o jembiba mapang DC-i, temesepba mozü achir tali küma aoba ajanga fifth aser sixth grade nung aliba school tanurtem dak kongshir, ta ashi. Paisa, stakeholder tem dang parnok mapang aser tashi ya lokti nung nisung shia dak rangloker intoktsü aser iba ken o bentettsü atema public health dak ajemdaker inyaksüla ta ashi. DC-

i, tsürapur aser lokti tentet balala lenirtem dang tanurtem den maneni sendaktepa alitsü aser parnok dang len sayua temesepba mozü ajanga lokti menentsüba azioktsü atema pei tinyaktsü takok ngua inyaksü ajungshia liasü.

Maneni pai, temesepba mozü anema raraba nung tatishitsü sayur tajung kaka asütsü koda tongtibang iba indang lemsatepba den iba ajanga shi temang aser tekelok, employment aser lenla ajak nung koda takoksa aludaktsüsü ali iba indang lemsatep.

Senden nungsa ADC-i, Sub-Division ajanga nung temesepba mozü achiba tali küma aoba ya raktoktsü atema lokti tentet balalai shilem agitsü koda tongtibang iba indang lemsatepba liasü. Pai, iba ken o bentettsü atema stakeholder tem ajak longjemer inyaksü ayongzüka liasü.

Iba senden amenba ajanga sensakemtsü, tasa yanglutsü aser longjemer sentong yanglua Jalukie Sub-Division nung temesepba mozü amshiba tali küma aoba ya nokdangtsü atema longjemer inyaksü asoshi lenmang lapoktsüogo.

Swachh Survekshan Grameen indang state level workshop agi

Dimapur, Chiteni/July 14 (TYO): Swachh Survekshan Grameen 2023 indang state level workshop ka PHED Directorate, Kohima nung Hokulbarnü agia liasü.

Swachh Survekshan Grameen (SSG) indang nükjidong ya linük nung aliba yimtsüngtem nung küm shia sanitation aser mürekmejuba jenjang asadanga indang lir. Linük tesem ajungalen yimtsüng balala nung mürekmejuba jenjang renlokba tsütsü tajunglen tokteptsü asoshi iba survey ya kanga tajung lir.

Iba sentong nung Thenusou Sekhose, State HRD Consultant, Sanitation & WSSO, PHED menden liasü aser Er.

Thsathrichem Sangtam, Chief Engineer, Sanitation and WSSO, PHED ajanga sentong tenzüka o jembia liasü.

'An overview on Swachh Survekshan Grameen 2023' indang presentation ka Rupali Mishra, Research Manager Ipsos ajanga agütsü aser laisa SSG - Direct observation on Household level, Village level, Public places and SBM (G) Plants indang PowerPoint presentation agüja liasü.

Swachh Survekshan Grameen (SSG) 2023 indang workshop tembanga Lhousikhono Zinyü, State Sanitation & Hygiene Consultant, WSSOPHED ajanga jembia liasü.

Jubilee Park nung Fika Hut lapok



Jubilee park, Dimapur nung tanü lapokba Fika Hut nung nisungtem chiyongtepba noksa nung angur. (TYO)

Dimapur, July 14 (TYO) : Dimapur nung Hotel Saramati anasa Ao Kaketshir Telongjem, Dimapur pur meyong Jubilee Park nung Aor lanur anati chiyongdak aser süngo ajemdak ka tenüng ago Fika Hut lapokogo.

Tanü iba Fika Hut

tesem ya Dimapur Ao Baptist Arogo nung sannüker N.Imtatsüng Imcheni sarasadema lapoktsü. Iba tesem ya tanur aser tain ajak sademsadema süngdong akhümbok nung mopung asena kazusak moapu tesem tajung ka lir. Yangi

Chinese, Korean, Indian aser Aor chiyongtsütem tajung jenjang dalang agi angutsü. Iba tesem nung lokti sentonga agitettsü. Fika Hut nungi chiyongtsü indang asüngdangnüra mobile number 70852 64436 aser 7005582092 nung asüngdangtettsü.

Abu Metha-i AR Rahman den state nung music industry indang jembia



Dimapur, Chiteni/July 14 (TYO): Advisor to Chief Minister aser Investment & Development Authority of Nagaland (IDAN) indang mendenpuba, Abu Metha-i July 14, 2023 nü Chennai nung kentener tejen Dr. A. R. Rahman ajurua liasü. Abu Metha meina TAFMA chairman, Theja Meru oa liasü. Rahman majurudang tenati Chennai nung KM College of Music & Technology sendanga liasü.

Metha aser Dr. Rahman na senden amendang Nagaland aser northeastern region nung music industry renloktsü asoshi tasa balala jembia liasü.

Parnoki tang teinyakdak projects, sentongtem indang nung rangloker jembia aser tarutsü nung Dr. Rahman aser pa indang institutions tem den lungjemer inyaksü atema jembia liasü.

Nagaland nung 'music' temaba jenjangi ajungkettsü

asoshi Rahman-i temolung agüja inyakba aser mentorship program ayongzüka asoshi state sorkar aser Chief Minister Neiphiu Rio-i pelaba osang Metha-i sangokja liasü.

2019 küm Hornbill Festival nung tongti tesemdang ka ama Nagaland semdangba sülen Dr. Rahman-i Kohima Orphanage & Destitute Home nungi kentener nem lenmang balala nung sayutsü sentong ka tenzüka pa indang Sunshine Orchestra küboki aitdaktsü.

Pai maneni Nagaland nungi Sunshine Orchestra nung züngsemtem nem tesayuba balala agütsür aser taküm küm tetenzüklen tanurtem Chennai-i anir oa British Council den lungjemer international concert ka ayongzüka nung ken tendakja liasü.

Chief Minister's Music Scholarship atema shimtetba candidates tem KM College of Music & Technology nung professional course balaka agir.

KM College of Music & Technology ya Asia nung nüngtugu ken sayuba reju ka lir, kong linük balala nungi tesayurtemi arua sayur.

Dr. Rahman-i Nagaland aser state nung kentener tem temaba jenjangi ajungkettsü asoshi audio-video promotional productions tem yanglur aser lenmangtem sayur.

Nagaland nung music industry nung Rahman-i pasasa molungteter shilem balala agiba atema Metha-i pelaba lemsatep aser pai temolung ajak agi bilemja inyakba ajanga nisung takum aika temelenshi tajung nung lir aser ibai linük yangerba nung yimya tajung temaitsü lir, ta ashi.

Dr. A. R. Rahman ya Oscar aser Grammy Awards tem anguba kentener tajung ka lir, aser pai international project aika nung tesayur inyaker aser ano linük balala nung aliba reju tem den lungjemer inyaker.

Dubai nung aliba World Expo indang kenten-menü sentong pa kübok lir aser yangji pa indang trademark studio amenoka lir.

Iba den külemi pa ya film yanglur ka lir aser music aser film studio aika pai anir lapoka lir.

Abu Metha aser Theja Meru nati KM College of Music & Technology semdangba mapang tesayur aser ketdangsurtem den sensaksem kaa liasü.

Parnoki tarutsü nung külemi teka amteper maparen balala inyaksü atema jembia liasü. Nagaland nungi ketdangsurtemi iba college sema jaja aser Nagaland nungi kaketshir temi sentong balala tenzüka tsüngtong oa repranga liasü.

Chandrayaan-3 takok ngua khakettsüogo



July 14, 2023 nü Satish Dhawan Space Centre, Sriharikota nungi ISRO indang Launch Vehicle Mark-III (LVM3) M4 rocket nung 'Chandrayaan-3' khakettsüodang tangokba noksa nung angur.

Sriharikota, July 14 (Agencies): Hokolbarnü ISRO-i LVM3 mission pezübuba takok ngua Chandrayaan-3 spacecraft 'orbit' nung khakettsüogo.

Ita-i khakettsüba mission tasembuba Chandrayan-3 atema ISRO-i tesüüba küm pezü tashi asalentong yanglua inyaka aruba sülen Hokolbarnü itai khakettsür.

Isro chairman, S Somnath-i, "India nem tenüngsang agütsür. Chandrayaan-3 'orbit' tashi takok ngua kkhakettsüba sülen ita-i atu tenzüokogo," ta metetdaksü.

Mission director Mohan Kumar aser Isro chairman nati, LVM3 ya taret bentetba Isro indang rocket tajungtiba kümogo, ta ashi.

Vikram Sarabhai Space Centre (VSSC) director, S Unnikrishnan Nair-i, "Küm ka nung LVM-3 rocket asem khakettsübaji mapa kanga tasak saka Isro team-i ibaji inyaktetogo," ta ashi.

Ato kilonser, Narendra

Modi-i twitter ajanga scientist tem nem tenüngsang agüja, "Chandrayaan-3 ajanga India nunger anünglaki atuba otsü tasen ka yanglutetogo. Iba ya anüng kanga temaleni atur aser India nunger ajak mangdang aser nükjidadong ajungkettsür. Iba ama mapa inyaktetba ya asen scientist temi kanga nendaka inyaka ajanga lir. Ni parnok nem tenüngsang agütsür," ta lemsatop.

2019 küm September ita nung India nungeri ita-i Chandrayaan-2 khaketja liasü saka ita nung junga manentetba ajanga tamakok angu.

Sentong renemba ama atalokra Chandrayaan-3 lander 'Vikram' ji anogo 40 tashi agia kilometer lakh 3.8 atuba sülen August 23 nü nikongdang 5:47 ako tashi nung ita nung anenzüktsü.

Istrac's Bengaluru centre-i satellite ji azüoktsü aser July 31 tashi nung satellite ji alima nungi kilometer lakh 1 shi pilar alitsü. Iba nungjagi maneni ita-i atutsü aser anogo 5.5 nung ita indang

orbit atongtsü. Ita orbit atongba sülen spacecraft aser lander module na pilatsü. Tesüsa ita nungi kilometer 30 shi dang pilar aliba 'elliptical orbit' atongtsü. Iba nungjagi lander ji anenzüka rover senzü tenzüoktsü.

"Taoba mapang Chandrayaan-2 anenzükba mapangji Madrid (JPL) ground station ajanga asadanga liasü, ajisüaka onoki tangbo Istrac Bengaluru centre nungi asadangtsü. Tanü nungi asadanga apibo August 23 nikongdang 5.47 ako tashi nungbo ita nung anenzüktsü," ta ISRO nungi scientist kati metetdaksü.

Lander Vikram nungji payloads pezü lir; kati ita nung menoknok asadangtsü, kati ita nung 'heat', kati plasma environment aser kati alima o ita na tsüingda tetsüingda kobika ita aliar jungjunga asadangtsü.

Pragyan nung payloads anati X Ray aser laser amshia ita kechi agi yangluar asadangtsü.

Justice Bhuyan aser Bhatti nati SC Judge tenangzükba agi

New Delhi, July 14 (Agencies): Hokolbarnü Chief Justice of India (CJI), DY Chandrachud-i ketdangsüa Justice Ujjal Bhuyan aser Justice S Venkatanarayana Bhatti na nem Supreme Court nung judge inyaksü atema tenangzükba agidaksüogo.

Justices Bhuyan aser Bhatti nati tenangzükba agiba sülen Supreme Court nung judge ajak senteper 32 kümogo, anungji menden tazüing ana dang

anünga lir. Ujjal Bhuyan aser S Venkatanarayana Bhatti na SC judge shimtsü atema central sorkari tena tenüng agizüka liasü. Justice Bhuyan ya Telangana High Court nung chief justice liasü aser Justice Bhatti ya Kerala high court nung chief justice liasü.

July 12 nü tena SC judge shimba sülen Bodhbarnü Union Law minister, Arjun Ram Meghwal-i tena SC judge

shimba osang sangdong.

Bhuyan ya 1964 küm August 2 nü aso aser 2011 küm Gauhati high court nung judge shimba sülen yaküm June 28 nungi Telangana high court nung chief justice inyaka liasü.

Justice Bhatti ya 1962 küm May 6, 1962 nü aso. 2013 küm April 12 nü pa Andhra Pradesh High Court nung judge inyaka aser taküm June 1 nungi Kerala high court nung chief justice teinyakdak lia SC judge shim.



July 14, 2023 nü France yimtiba, Paris nung India Ato kilonser, Narendra Modi aser France Ato kilonser, Elisabeth Borne na leniba nung ketdangsertem senden amendang tangokba noksa nung angur.

Tzünglu dak sendakba lendong balala nung ano nisung 34 süogo

New Delhi, July 14 (Agencies): Tzüngluruwa mongpu tenzüokba sülen tesüüba ghonda 24 tsüingda kija nung north India nung tzünglu dak sendakba lendong balala nung nisung 34 süogo aser ibaji densemabo tesüüba anogo trok tsüingda nisung 150 süogo, ta ketdangsertemi metetdaksü.

Punjab, Haryana aser Uttar Pradesh state tem nung tang tashi tzümetsüing tensa lir. Relief teams-i Himachal Pradesh kübok Lahaul Spiti aser Kinnaur district na nungbo lisopur aser raliwalir 1,000 dak tema kümzüokogo.

Tesüüba ghonda 24 tsüingda lendong balalala nung asürtemji Uttar Pradesh state nung nisung 17, Himachal Pradesh nung nisung trok, Haryana nung pongu, Punjab nung pezü aser Uttarakhand nung nisung ana asüba densema lir.

Uttar Pradesh nung tsüingda lendong nung nisung tenet asü, nisung pongu tzi nung arakseta asü, ki chirepba lendong nung nisung asem asü aser tanur ana light current agi puseta asü.

Uttar Pradesh nung tesüüba

anogo trok tsüingda tzünglu dak sendakba lendong balala nung nisung 55 tashi süogo.

UP nung ayong aika nung tzi tali mobanga yimdar, talisa Yamuna ayong nungbo tzi tali mobanga ayimba ajanga nüburtim timtemtsüsa tensa ka nung lir.

Brihostibarnü Himachal Pradesh nunga nisung trok asü aser ibaji densemabo state nung tzünglu dak sendakba lendong balala nung asür ajak senteper 33 jungogo; iba dak alia state nung nisung 16 samaogo.

Punjab nunga tzünglu dak sendakba lendong nung nisung ajak senteper 15 süogo, Haryana nung nisung 16 aser Uttarakhand nunga 17 süogo.

Uttarakhand nung arrshi küm 20 temeshi aini aoer Gujarat nunger ka lung agi onseta asü aser tang tashi nung azüklen nungi lung aluba lendong nung nisung 12 süogo, nisung 15 yiru aser nisung asem samar mangur.

Uttarakhand nung tesem aika nung anentsüh aluba ajanga gari lenmang 300 shi mokdangogo.



July 14, 2023 nü Paris nung Bastille Day parade nung Indian Air Force contingent-i shilem agidang tangokba noksa nung angur.

Maharashtra nung NCP Ienir Ajit Pawar nem finance ministry agütsü

Mumbai, July 14 (Agencies): Maharashtra nung teloktep sorkar telung nung mangatetep adoktsüsa tawa teloktep nung adener Ajit Pawar-i aniba Nationalist Congress Party (NCP) telok nem finance ministry den department trok agütsüogo.

Ajit Pawar leniba nung NCP MLA 8-i Maharashtra nung Eknath Shinde-i aniba sorkar nung adenba sülen hopta ana lir Cabinet ulushia parnok nem menden lemzüoktsür.

Ajit Pawar-i aniba NCP telok nem finance & planning, food & civil supplies, cooperatives, women & child development, agriculture, relief & rehabilitation aser medical education departments lemzüoktsüogo.

Deputy Chief Minister, Ajit Pawar nem Finance & planning department lemzüoktsü, Dhananjay Munde nem Agriculture, Hasan Mushrif nem medical education aser Chhagan Bhujap nem Food &

Civic supplies department lemzüoktsü.

Dharmarao Atram nem Food & Drug Administration department aser Aditi Tatkare nem Women & Child Welfare department lemzüoktsü.

Hokolbarnü Chief Minister's Office (CMO) nungi ketdangsertem Raj Bhavan-i oa Angh nem portfolio list agütsüogo. Angh-i iba list agizükba sülen Chief Secretary nem agütsütsü.

July 2 nü Ajit Pawar den NCP MLA-i Maharashtra sorkar nung minister tenangzükba agia liasü. Parnoki NCP toktsüba ajanga Sharad Pawar-i aniba NCP telok nung telemsa adok.

Tang Maharashtra Cabinet nung BJP nungi minister 9, Eknath Shinde-i aniba Shiv Sena nungi minister 9 aser NCP nungia minister 9 kümogo. State nung chief minister aser deputy chief minister na dak alia minister menden ajak agi 43 tashi alitsü akok.



TIR YIMYIM

YIMOBILEM (EDITORIAL)

DIMAPUR

KÜPTOKNÜ

CHITENI 15, 2023

Ajak arogoi inyaktsüla na ?

Nagaland nung yi ajem manener aser mozümora tapu balala bener arua achirtem tezünang züiner. Ajia arogo dak atonger ! Nagaland nung election junga magitetter, ajia arogo tai ! Government mapa kata shitak mali, tulubaa tuluba yari aser tilabaa tilaba yari yimtsüng aser kiyong mepu tashi terenlok aser temoatsü sen agi miimmechi aser miimmena küma amshiba agi merenloktetter, ajia arogo tashimaitba agi ! Gari lenmang agi ayong ama kümer yimsüsürtema timtema jajar, anungji iba lenmangjia arogo nungertemisa inyaktsüla ! Tzü mopong kanga majung akümer, ajia arogoi jembitsüla ! Lanurtem school junga mezüngtetter aser züngtetyonga mapa mangur, anungji itemjia arogoi anepalutsüla ! Aji oda, kima yimdong jana aoktsü dena asenoki Arogo dak imlar. Itemji kodang bilemdangdir, arogo nung item nüngdak ajak inyakdi asünungbo arogo nunga government ama department shia office lapoker, deacon anana asemsem den Associate pastor, Alcohol & Narcotics Control; Associate pastor, Vigilance & Anti Corruption; Associate pastor, Road & Bridges; Associate pastor, Election; Associate pastor, Skill Training & Emploment; Associate pastor, Rural & Urban Develoment; Associate pastor, Jal Jeevan & Ghar Jeevan Mission; Associate pastor, Agri & Vety Allied; Associate pastor, Environment & Sanitation aser Associate pastor, Medical & Health Missions ta arogo shia associate pastor aika nüngdaktsü. Atangji, inyakdi süra item ajakji arogoia inyaktettsü, asenok amangba purtemiang ter shilem den temeranger aser temulunger tenla meranga abentsüla. Süra , arogoji shiba aser shirnok ? Asenoki arogo indang jembidang, jet ta pastor aser deacon-tem ta dang temulungi arur, anungji asenoki mapa ajak nung arogo aitsüba tetezü aser tangatetbaji pastor aser deacon-tem aitsür. Ajisüaka, shitakba arogojibo asenok arogo nung baptiba züngsemtem lir saka pastor aser deacon-temjibo tenzüker aser kilirtem dang lir. Aji oda, yi jemdaktsübaji tenzükertemi jemdaktsür masü mesüra mozüji tenzükertemi ajungshia chidaktsür masü saka asenok arogo nunger tsüraburtemi junga melitetba agi aser junga mesayutetba agi ajemer aser achir. Kasaji, terenlok atema aruba temoatsü agi miimmena küma amshibaji arogo tenzükertemi masü saka asenok arogo nunger yimsüsür, officers, contractors aser lokti lenirtemi amshir. Aji oda, tanurtem school mezüngtettsüsa anenba aser zünger mapa mengutetba tebilemstüjia arogo tenzükertemi junga metenzükba agi masü saka asenok arogo nunger government nung tenzükertem meshitakba ajanga ajak meshitak akümer. Atangji, asenok aikati arogo nem tenla agütsür, kechiyong arogo nem agütsübaji Tsüngrem nem agütsür ta angateta lir. Ajisüaka, tenla agütsüba senji kong nungi aruba sen agütsür ? Shitak agütsür asü, madoksa agütsür ? ta asübajiang alima aser kotak asoshi tongtibang asütsü. Atangji, alima majungba agi aji jungdaktsütsü atema arogo alir, anungji nübortemi arogo dak nungi tajung imlatsübaji tim dang lir. Kasaji, nisungtem timtem aser shisabolu nung aliba yaritsü aser item nemji teimla aser tekümtet agütsütsü asoshi arogo alir, anungji arogo dak nungi mapa aser teyari imlatsübaji tim dang lir. Tai aser tamakok ajak arogo nem tongloktsubaji tajunglen nungi agidi süra nübortemi arogo dak teimla aliba agi ajungshir. Ajisüaka, asenoki arogoji asenok ta angatettsüla aser tamakok aser teinyaktsütemjia asenok arok meyong ta bilemstüla. Ibayongji, joko arogo aika nung tanüla jenjang dang masü saka kija kibong taküma sensaka melii tebok süngabosa lidaktsütsüsa, talisa, lanurtem dang mapa tapu balala inyak sayur aser senotsü tashi teyari agüja business aser aluyimba mapatem tenzükdaktsür. Iba tangatetba jagi asenoki asenoksasa machimajemtsü nungi pilatsü, miimmechi mapa meinyaktsü imlar. Idangji dang asenok arogo nung awaa oa tanüla anir aruba mapa inyaktsüsa mapang aser rongsenangutsü. Atangji, arogoi PWD lenmang anepalu mesütettsü, anungji lenmang mejungra lenmang majungdakji oagi lenmang ya jungjang ta sarasademtsüba dang, mapajibo PWD-i inyaktsü. Iba amaji arogoi sarasademli yimteni mapaji shitak inyakli ta süra asenok arogo nungertem ajak Tsüngrem yimli nung liadoktsü.

OLEMSABANG

Temelenshi adokdaksüba lenisüba: Mosa taküm aser lenisüba nungi tangazüktsü kar

Temsüyanger, CTC (source:- Mitkar)

(Yashi adok nungi...)

Mosa Lenisübai Ajangzükba aser Pa Taküm Nung Tongtibang Lenisüba Kar

Mosai pa nübortem alar tia nung aliba angu, par nübortemi aginübatem pai meteta liasü, saka nübortem alar tia nungi anitetsü asoshi sentongjibo Tsüngremer sentong liasü. Tsüngremi Mosa nem lenisüba khuret nonglokttsü, aser aji ataloktsü asoshi Mosa dang Tsüngremer tenangzükba liasü. Mosa lenisüba ajanga par lokti taküm nung tongtibang temelenshi ana bena arutsüba: mezüngbuba nung, kin ter ana lungjema küma Israel kin aser par yimsüsüba yangerttet; tanabuba nung, Ijip lima alar tia nungi par nübortem anitet (Ani. 3:16-18). Mosai ajangzükbatem aser pa taküm lenisüba kar:

- i. Nübur mulungjang nung Mosa dak temulung lemtettsüsa pai mapa taküm agi sayu. Yamaji tarutsü asoshi teimla nübortem nem agütsü. Nübortemi pa dak temulung alem. Khen khen nübortemi pa dang nemnemaka parnok pa sülen anidaktsü nongnanga maliasü (Ani. 15:24; 17:3).
- ii. Tenangzükba lima artsü matong tashi pai nübortem ani. Pai nübortem dang nangzükba ama pai atalokdaksü. Lenmang nung timtem teokrong aika ajuruaka pai nübortem dang nangzükba kodanga metoktsü (Tazüng. 5:1-2; 7:18; 8:2; 9:7).
- iii. Pai nübortem lenmang nung ani, parnok yari, Tsüngrem aser nübortem tsüngda pa odanger liasü. Tsüngrem nungi nübortem pilaa pai meyok aser par Tsüngrem Yihova mamatsü asoshi teti nübortem ajungshi (Ani.14:31). Pai parnok den jembi, sayu, aser lendongtem parnok dang sayu. Nübortem asoshi tatishitsü lenir ka pa liasü. Pa ochishir lenir ka liasü.
- iv. Mapa küma inyaktsü pai nübortem dang sayu. Tejakleni nübortem aotsü tejangraba aser parnok nükjidong ajangzüktsü asoshi pai teti nübortem nongita teyari agütsü (Ani. 14:14; Tazüng. 1: 29-30).
- v. Pa mabensabatem aser abensabatem pai meteta liasü (Ani. 3:7-12; Ani. 4:1; Ani. 4:10).
- vi. Pa kanga ajemaluba taküm aser kanga khuret bentetba taküm ka liasü (Ani.4:12-14).
- vii. Kanga tenendak nisung, nükjidong matong tashi nentaka inyakba lenir taküm ka. Küm aika nübortem azüngmeyakdak lenmang nung jajadang pa dak taochi agi sünga liasü (Ani. 14:14).
- viii. Tangar asoshi aria bilemba lenir ka liasü (Ani. 18:13-27).
- ix. Ajak nung pai Tsüngrem madang metaloka liasü. Tsüngrem Pa lenir aser teyariteper liasü (Tazüng. 31:7-8).

Melepzüng:

Mosa taküm aser mapatem nungi asenoki angateter; pa merumeru taküm ka masü, takokba mapa asoshi pai kodanga lenmang tatsüba nung mejaja, anungji pa ochishiba taküm takang ka liasü, aser pai tangar alema tua maangka kodanga mebushi aser pa asoshi kecha mebushi. Kodang nisung ka taküm nung iba ama sempet taküm tajung lidir pa/la temulungjang, tebangotem, aser inyaksangshi sütepsütepa alir. Kodang lenir kati yamaji tebang o aser mapa sütepsütepa lidir nübortemi pa/la dak temulung alemer, aser kodang nübortemi temulung lemdir pa/la chichiba lenir ka akümer. Nübortemi temulung lemtetba lenir kaji chichiba lenir ka lir. Pei asoshi taginübatem aser mulungbatem alema lokti asoshi tajung bilema inyaktsü asoshi Mosa taküm ajanga sayur. Mosa taküm nungi maneni angazüker; lenir ka taküm nung tongtibangtiba taküm leniba kaji pa/lai pei jenjang metettsüla, aser pa/la taküm shisatsü akhümtsüba yamaji pei taküm nung litetta tangar dang sayutettsüla, kechiaser tatishitsü tajung aketba lenir tajung ka jagi pa/la jaklaliru aser mapa ajanga sayur. Lenir tajung ka jagi mangdang tajung shisateta iba jagi nübortem jaklaliru melenshidaktsür. Lenir tajung ka jagi tarutsü asoshi mangdang tajung nguteta iba mangdang tajung tangar dak benloktsür. Lenir shibai tarutsü asoshi mangdang tajung angur pa/lai pei taküm nung aser mapa nung timtem agitsü asoshi renema alir, aser pa/lai aibelentem nungi tangazükba tajung nguteter. Lenir tajung kati nübortemi temulung lemtettsüsa taküm nung liteta sayur, teyaritep tajung nung tangar den tesendaktep tajung yanglur. Lokti telungjem mapa (team work) aser teyaritep pa/lai kanga senti süa agir. Pa/lai lokti nung tangatetbatem balala angatettsü meranger aser yamaji lokti nung tangar akümtsüba tangar den tesendaktep yanglur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Khristan melungtet telok World Vision USA Tir, Edgar Sandoval-i yaküm Kenya semdangba mapang Nakorio yimdam chiyungtsü lema agütsüdang tangokba noksa nung angur. Tang alima nung nisung million 735 shi aya-tzura tia nung lir, ta July 12, 2023 nü UN agency pongui renemba report "State of Food Security and Nutrition in the World" ajanga sangdongogo.

Pope Francis-i Mongolia nung 'House of Mercy' semzüksütsü

July 14, 2023: Taküm September ita nung Pope Francis-i Monglolia linük semdangba mapang nung pai Mongolia nung Arogoi yangluba 'House of Mercy' center semzüksütsü.

Mongolia yimtiba, Ulaanbaatar nung bendangertem aser timtemertem jenoka lidaktsütsü atema Arogoi charity center ya yanglu.

Pope Francis-i taküm September 1 nungi September 4 tashi Mongolia semdangtsü aliba dak sendakba sentong tejangja Vatican-i sangdongogo.

Mongolia nung Pope Francis-i Khristantem, Arogo lenirtem, yimsü balala nungi lenirtem aser sorkar tongti ketdangsertem ajurutsü.

Francis-i "Longjemer imlaba" omen nung ajemdaker Mongolia semdangtsü. Pai September 4 nü Ulaanbaatar yimti kübok Bayangol district

nung House of Mercy semzüksütsü sülen Rome-i meyipa aotsü.

Mongolia nung Khristan nütsüng 1,500 shi dang lir aser missionary 77 shi lir.

Italy nung missionary, Giorgio Marengo leniba nung 2019 küm House of Mercy yanglutsü atema project tenzüka liasü aser yaküm Pope Francis-i pa Mongolia nung Cardinal shimogo.

Mongolia nung pei kidang kinüngburtemi azükba ajanga takoksa angur tetsürtem aser tanurtem jenokdaktsütsü nükjidong nung House of Mercy yanglutsü apiteta liasü.

Mongolia nung kibongtem aser loktiliba ajak nung teburtemi tashi tali amshir, aser ibaji ajanga kibong kümer alir tetsür shilem 57.9 aser tanur shilem 46.8-i kinüngbu mesüra tebei azükba ajangshir, ta International Development Law Organization-i

metetdaktsü.

House of Mercy yanglutsü atema Catholic charity Caritas aser Pontifical Mission Societies (PMS), Australia-i senotsü teyari agüja liasü.

Tamalen Sisters of Saint Paul de Chartres-i lapokba school kimong nung House of Charity building ya asemben amentepa süogo. Iba centre nungji tetsür-tanurtem dang masü saka timtemertem aser bendanglen nungi arua tejenokdak malirtem-a jenokdakja yaritsü.

Mongolia nung nütsüng shilem 60 shi dang Tsüngrem dak amangertem lir, aser Tsüngrem dak amangertemji shilem 87.1 bo Buddhist nung lir, shilem 5.4 Muslim nungertem, shilem 4.2 Shamanists, shilem 2.2 Khristantem aser tanüngba shilem 1.1 ji tanga yimsü amangertem lir, ta US State Department-i metetdaktsü.

Khristantemi Indian Parliament nung Manipur atema jembidaktsüner

July 14, 2023: India sorkari European Parliament nung Manipur tensa atema jembitsü memelungbaji India nung Khristantema aikati pusema liasü, ajisüaka Indian Parliament nungbo iba tebilemstü onük jembitsüla, ta Khristantemi akhanger.

New Delhi nung aliba Zomi Christian Fellowship (ZCF) nung pastor, Rev. Jangkhulun Mangte-i, "India sorkari Manipur nung mapang talangka raraan arubaji linük telung tebilemstü onük ta ashijaji tim dang, ajisüaka onoki Manipur nung yimjung alitsü aser ajak pelaa alitsü atema state aser Central sorkari yimjung atema inyaktü onoki mepishir," ta metetdaktsü.

nungi tentetba fellowship ka lir aser ZCF nung züngsemtemji Manipur aser Mizoram densema northeast state tem nungi Delhi-i arua alir kaketshirtem aser kibong züngsemtem lir.

Rev. Mangte-i, Manipur nung rara tenzüka sülen ita ana jungogo, aser sorkar ketdangsertem state nung yimjung atema inyakdar ta ashir, saka tang tashi yimjung mali, ta ashi.

"Atangji iba ya tejashitsüka lir aser India nung dang masü saka alima tesem balala nung alirtemia telok ana tsüngda raraba atema jashir. Nisung ajaki yimjung atema sarasademtsüdar," ta paisa ashi.

United Christian Forum (UCF) nung National

Coordinator, A.C. Michael-ia India sorkari Manipur onük ya linük telung onük lir ta ashiba nungji Khristantemi ai-aura akar, ta ashi.

Osangbener den jembidang pai, "Ozüng kübok senso ka ama ni-a iba ya linük telung onük lir ta bilemer. Asen linük tebilemstü onüktemji asen sasa bentettsüla," ta ashi.

"Ajisüaka Central sorkari tangsa Indian Parliament nung Manipur nung rara atema jembitsüla aser aibelenertem nem temerenshi agütsütsüla," ta pai ashi.

A.C Michael ya Federation of Catholic Associations of Archdiocese of Delhi nunga Tir lir aser pai, "Iba ama tongtibang onük ka nung asen Ato kilonseri ola madokba atema Khristantem jashir," ta ashi.

ANOGO ABEN TSÜNGREM DEN

Taküm nungdak anguba

T.ken 118:10-18

"Kibuba kü tashi aser kü ken lir, Pa kü tekümtet küma lir" (t.14). Ibai Anitet 15:2 aser Isaia 12:2 nunga lir. Israel nung Ijip nungi adoker Tenangzükba Limai aodang, parnoki parnok tsükchirtem tzüym nung samaba ngur iba ken aten. Isaia 12 ji kodang Tsüngremi parnok kümzüker Pa yimli yangludir, idangji Israeli iba ken tarutsü nung atentsü ta Tsüngremi nangzük. Tanüa asenoki iba ken tetezü nung pelateptsü akok.

Tsüngrem asenok tashi lir. Iba jagi asen taküm nungdaktem anepalutsür. Tashi angutsü nai kong bushir? Nai metetba? Na anema aliba? Ne sen? Item ajak ya samatsü. Kibuba tashii dang taküm nungdak agütsütsü akok. "Shirnoki Kibuba dang ataa alir parnoki tashi tasen angutsü" (Isa.40:31).

Pa asenok ken lir. Iba jagi taküm nung saksalemdaktsür. Aika taküm nung jangramatem mapang ajanga aor. Nai aginüba ama mesüi süidaktsür. Tangari anguba maangka mapang tajung mangur aser meinyakteter. Kibubai ne nem tepela agütsütsü.

Pa asen tekümtet lir. Iba jagi asenok taküm lendong nungi kümzüker. Pai asenok kümzüker aser teti asen tsütsü lir. "Kibuba teka achichi ajungketa lir: Kibuba teka tachichi agi takok inyaker" (t.16). Iba teka tanüa asenok den lir.

Tamangertemi iba ken atentsü akok, kechiaser Tsüngremi asen nungdak ajak anepalutsür aser taküm lendong nungi kümzüker. Taküm timtem ajak nungi Tsüngremi na kümzüker ta bilemettang.

'The resurrection' film ya puti otsü nung film tajungtiba asütsü: Jim Caviezel



July 14, 2023: Mel Gibson-i yangluba kanga nungtugu film "The Passion of the Christ" nung Yisu shilem agisang, actor Jim Caviezel-i, "The Passion of the Christ" film tasenba adoktsü aser film ji telemsa ana asütsü, ta metetdaktsü.

Tesüiba küm aika film tasenba- "The Passion of the Christ: Resurrection" adoktsü atema jembia aruogo. Tawa "The Shawn Ryan Show" nung jembidang Jim Caviezel-i, project tasenba ya film ana küma lemsatsü, ta metetdaktsü.

"Gibson-i iba project tasenba atema mapang talangka inyaka aruogo aser film tasenba ya puti otsü nung film tajungtiba asütsü. Film ji ana asütsü mesüra asem asütsüa akok," ta pai ashi.

Film tasenba nunga Caviezel-i Yisu shilem agitsü. "The Passion of the Christ: Resurrection" film atema tesüiba küm ter tashi inyaka

aruogo. 2016 küm Harvest Crusade nung pastor Greg Laurie den jembidang film director, Gibson-i, iba film otsü yanglutsü atema pai mapang peria aginüa liasü, ta metetdaktsü.

Pai Laurie dang, "Film tasenba dang 'The Resurrection' ajar," ta ashi.

"Ajisüaka iba otsü azüngtsü, ajangshitsü aser teratet tarok metettsü atema teinyaktsü mapa aika lir," ta Mel Gibson-i metetdaktsü.

Taküm January ita nung film journalist, Jordan Ruimy-i, "Gibson-i Braveheart film otsü zülusang, Randall Wallace den külemi project tasenba atema inyakdar. Otsü trokben tashi zülushio. 'Resurrection' film ji Yisu Khrista tu-ashiba aser Pa

Kangki nung metaba nungi tasü nungi shia aruba tashi nung tatalokbatem asütsü," ta metetdakja liasü.

AO OSHI ANGAZÜKDAK:
TANÜ ANGAZÜKTSÜBA OJANG



Repakati

(n) ka den tali jungshitepba (maintain special relationship with a particular person)
* Moaba kü repakati tembar liasü.

Repdak

(adj) moutet tsükdak, o mereptet (stumble, stutter)
* Kimalen tetsüing repdaka yur ola madoktet o dena repdaka ayu.

OLONG PAITEP # 6576

									1
2		3		4					
5			6			7			8
9			10						
		11						12	
							13		
14	15				16				
			17						

TIPIEN

- 2. Tetendangba - (8)
- 6. Metet / Ashi - (7)
- 9. Asen / Saklok - (4)
- 11. Acha-ayanger - (7)
- 13. Bangsentep - (4)
- 14. Meshizüka magi - (7)
- 17. Tetezü aketba pungmang - (8)

LANGTSÜNGLEN

- 1. As _ _ _ _ nshi - (4)
- 3. Putep - (5)
- 4. Tashi balaka - (3)
- 5. Iba küm - (5)
- 7. Alima nungi pila orr - (4)
- 8. Komo temaitsü - (5)
- 10. Tapok - (4)
- 12. Tamajung aküm - (5)
- 15. S _ _ _ _ ü - (4)
- 16. S _ _ _ ga - (3)

OLONG PAITEP # 6575 TELANGZÜBA

TIPIEN:

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

LANGTSÜNGLEN:

- 1. Temesen, 2. Raksa, 3. Aon,
- 4. Aso, 6. Nile, 9. Alizüing,
- 10. Omen, 11. Lemta, 13. Ola,
- 14. Kin.

NAI-A YA METETTER MA



Kümshi per agi mejiba agi asüba dang nungibo ninang agi metaker asürtem teimba.

Second 44 tsüingda meputepi aliba 10 bushiang



Hynniewtrep Youths' Council-i ILP

tenzüksür akhanger

Shillong, July 14, 2023

(Agencies): Hynniewtrep Youths' Council (HYC)-i Meghalaya nung Inner Line Permit (ILP) mapa tenzükung ta takhangba agüja July 14 nü Secretariat building jakdang lungkak aitogo.

Sorkari Meghalaya tashi railway lines bener aruba magizüker ta sayua HYC züingsemtemi "No railway without ILP" yimyim ayima lungkak ait.

MPCC president aser MP Vincent Pala-i Meghalaya tashi railway line arubaji junger ta ashiba HYC züingsemtemisa aitsü.

"Railway aru nunga ni atemabo kecha masü. Asenok railway lira senzüsenbong kanga zübarsü aser mapa aika inyaktetsü. Saka asenok loktiliba nung alir aser asenok tsüingda angatettepsü mesüra mangatettepsü akok" ta Pala-ashi.

Iba olen atema HYC züingsemtemi "Down, Down Vincent Pala" ta yimyim ayima lungkak ait. Parnokisa "MRSSA Bill" samaba atema tebilemstü abenba osang lemsatet.

Office of the MOLUNGKIMONG OZUKUM KIDONG TENÜNGSANG AGÜTSÜR



Nagaland Public Service Commission (NPSC) ajanga agiba Common Educational Services Examination (CESE) 2022 nung A. Imsu Ozukum aser Kumzukla Longchar na jala I. Tainjungla Ozukum-i Technical Education Department kübok English nung Lecturer jenjang ngutetba asoshi Molungkimong Ozukum Kidong ajanga tenüngsang agütsür.

Maneni nü takum aser wadang ajak nung Tsüingrem lenisüba denang ta kidongi sarasademtsür.

Sd/-
(A. Rongsen), President

Sd/-
(I. Bendang), Secretary

TENÜNGSANG AGÜTSÜR

Mrs. P. Temjennungla Imsong, D/o. Lt. Panger Imsong aser Mrs. Alikangla Jamitsür tena jala 2022-2023 NPSC, CESE Exam nung Post Graduate Teacher (Education Department) nung takok tulu anguba asoshi asen YAONGYIMSEN DIMAPUR IMLIJUNG ELANGTSÜR TELONGJEM-i kanga pelaba tenüngsang agütsür.

Tsüingremi tarutsü Putu nung nü taküm aser wadang nübertem asoshi maneni moajangma.

Sd/-
Temsumongla
Tir, YDIET



Sd/-
Limala Imsong
Tezüür, YDIET



GOVERNMENT OF NAGALAND
DIRECTORATE OF TECHNICAL EDUCATION

☎ 0370-2270409
☎ 0370-2271432

Nagaland : Kohima - 797 004

NO.DTE/SCTE/6/2020-21/4777

Dated, Kohima, the 14th July, 2023

NOTIFICATION

NO.DTE/SCTE/6/2020-21: In continuation to this office letter of even NO. Dated 09-06-2023, Interested candidates wish to study Diploma Engineering Courses at State run Government Polytechnics may apply at the Directorate office or the nearest Polytechnics. The eligibility / entry qualification is 10th passed/ SSC exam from any recognized board as per the latest AICTE Approved Process Handbook 2023-24.

Nomination and last date of admission is 21st July 2023. The prescribed application Form is also available in the website www.dtenagaland.org.in

All other terms and conditions as notified earlier remain the same.

Sd/-
(Er. VIPULHOU LHOUNGU)
Director

Mizoram-i Assam arrtsülen yimtsüing 62 aliba kuli agütsür

Aizawl, July 14, 2023

(Agencies): Mizoram-i Assam den arrtsüa aliba inner line reserved forest telongtet nung yimtsüing 62 lir ta Mizoram Home Minister Lalchamliaana-i ashi.

Bengal Eastern Frontier Regulation (BEFR) of 1875 ajanga Mizoram indang arrtsü shitakba ta 509 square mile (1,318 square kilometres) inner line restricted forest area latettsü.

Külen, Assam-i arrtsüji Survey of India nungi 1933 map nung aliba lir ta ashir.

Assam kübok district asem-Cachar, Hailakandi aser Karimganj ajanga Mizoram district asem- Aizawl, Kolasib aser Mamit den kilometer 164.6 agi arrtsütepa lir.

"Onoki February ita Assam nem ozü temeten agütsüo. Onoki parnok dang nungi telangzüba atar" ta

Lalchamliaana-i ashi.

Assam den taruba arrtsü olemtep alitsü anogo melatet lir. Mizoram aser Assam tsüingda arrtsü atema ministerial-level nung olemtep asemben liogo.

July 2021 nung state ana tsüingda arrtsü mangatettep adoka raradang Assam police 6 aser civilian ka asü.

Iba lendong ya Mizoram nung Vairengte yimtsüing anasa atalok aser nisung 60 tema yiru.

NEHU tesayurtemi Manipur atema 'Peace March' agi

Shillong, July 14, 2023

(Agencies): Manipur nung Meitei aser Kuki nung tsüingda ita ana tema rara manenba atema tebilemstü bena aser yimjung alitsü tayongzükba agüja North Eastern Hill University Teachers' Association (NEHUTA)-i 'Peace March' ka ayonga agiogo.

Manipur nung lendong balala atalokba atema tebilemstü abener

asir yimjung nung alitsü mepishir ta NEHUTA president Prof Lakhon Kma-i ashi.

Iba sentong nung NEHU kaketshirtem aser teaching staff noklang aikati tezüluba balala amer shilem agia liasü.

Parnoki Manipur nung mepetmesü adoka aliba kin ana dang yimjung nung putepa alitsü aser tangatettep kati arutsü

mepishia metetdaksü.

"Centre sorkari kin ana tsüingda rara madoktsü atema teinyaktsü tim inyaktüsü. Tesayurtem telok ka ama onoki telok ajak dang ozüing alema inyaksangshiba anentsü ayongzükba aser Centre sorkari tekaratiba nung tensa süngjemdaksütsü atema mapa inyaktüsü mepishir" ta Prof Kma-isa ashi.

Aung San Suu Kyi temang junga lir: Myanmar

Naypyidaw, Chiteni/July 14 (Agencies): Mitkar temi tashiyim amshia 2021 küm February ita yimten tashi rakzük dang apuba aser miimshia ken o balala benoka jembia tepuokdak yua alila Aung San Suu Kyi temang junga lir, ta Myanmar-i ashi.

Sorkar meyong Global New Light of Myanmar nung Hokulbarnü sangdong tatsüka agütsüba nung Thailand Foreign Minister mapa toktsütsü alisang Don Pramudwinai ya July 9 nü Myanmar-i arua Aung San Suu Kyi den ajurutep aser la temang junga lir, ta information head Major General Zaw Min Tun-i ashi.

Mitkar temi tashiyim amshia sorkar atsüngdokba sülen bendanger diplomat mesüra yimten yimsüsür nem Aung San Suu Kyi ajurudaktsüba ibai mezüngbuba alitsü.

Miimshia ken o balala jembiba mapang ochimashi mapa inyakba nungi official secrets raksatsüba densema aibelen ngutetba sülen arishi

küm 78 tain Suu Kyi ya tepuokdak yua lir.

State Administration Council (SAC) indang information team lenir Major General Zaw Min Tun-i ashiba agi, Don aser Suu Kyi tsüingta senden amenba nung tenokdangba kecha meliasü aser minute 90 amen. Mitkar lenirtemi par sasa parnok dang SAC ta ajar.

"Parnok tsüingta sensaksemba tejangja onoki memetet," ta sangdong ajanga ashi.

Association of Southeast Asian Nations (ASEAN) nungi foreign minister tem Jakarta nung adenshia Myanmar tensa tamajungba akuba indang jembishinütsü anogo ishika lia Don ya Naypyidaw-i ao.

Jakarta nung minister tem den jembidang, yimjung nung tangatetep kati arudaktsünüba Myanmar tembar ama semdang, ta Don-i ashi.

ASEAN nungya taoba military administration kübok 1997 küm Myanmar züngsem akum, saka azüdokshi anena mepetmesü bentettsü atema

2021 küm April ita mitkar lenir Min Aung Hlang den five-point consensus (5PC) züngzüktepba ama mitkar lenirtemi meimyakba mechi iba linük ya ASEAN indang senden tongtipang nung nokdanga lir.

Iba 5PC kübok tajung asoshi jembishinütsü, azüdokshi tangsa anentsü, ASEAN special envoy ka shimtsü, ASEAN delegation kati telok ajak den ajuruteptsü aser humanitarian assistance densema lir.

Aiben mepishiaka ASEAN ketdangsur temi Aung San Suu Kyi ajurutsü memela aser iba 5PC tezüngzüktep agiba sülen linük telungzük nung tensa tamajungba ang akum.

Brehostibarnü senden tatem ASEAN foreign minister temi Don-i Myanmar semdangba ya tajung asoshi lir ta linük aikati repranga atar, ta ashi.

Ajisüaka mepetmesü adoka aliba angatetteptsü asoshi 5PC ya tang tashi tamendak dak lir ta nenshia ashi aser maneni rongrongshirong aliba sashi-sashia aitsü.

Rongrong paitoktsü mechi South Africa nung army yoka lir

Cape Town, Chiteni/July 14 (Agencies): Taoba hopta South Africa linük tesem balala nung lenmang tem nung osettsüset abenba gari 21 shi nung mi senloktsüba sülen Hokulbarnü province pezü nung army yoka lir.

Iba ama lendong ya kechi nükjidong nung agütsüar ketdangsur temi mejangja, saka Police Minister Bheki Cele-i ashiba agi, South Africa nung rongsenketzüng jenjang raksatsütsü asoshi inyak südi.

Iba mapa ya shir ajanga inyakar pai mashi saka police temi item lendong nung

sendaka alir südi ta bilemer nisung 12 bushiba mapang lir.

"Item ya kanga junga ayongzuka inyakba maparen lir," ta Cele-i sangdong ka nung ashiba South African sorkar indang news agency ka ajanga ashi.

Truck tem rongdoktsüba ya 2021 küm July ita hopta junga azüdokshia rongrong adokba den sendaktepa aliba kuli mali, ta Cele-i ashi. Court mezüngmeshiba mechi taoba tir Jacob Zuma tepuokdak ayuba ajanga 2021 küm iba longkak aita nisung 350 tepset aser shishilempaba tesemtem nungi

rakzük raktema liasü.

Medical parole nung Zuma tekeraba nung chioktsüla ta obendang agütsüba ya tim masü aser pa temerenshi ita 15 tepuokdak ayutsü obendang agütsüba ama tanünga ita 13 ya tepuokdak ayutsüla, ta South Africa indang court tematiba, Constitutional Court-i bukumba Brehostibarnü sangdongba sülen iba ken o ya ano tanaben temai adok. Iba telemtetba mechi South Africa nung ano Hokulbarnü rongrongshirong tulu adoktsü imlaa lir.

(Maneni tapak 8 nung...)

Wagner mercenaries nem Russia nung tenzüktsü maongka agütsü: Putin

Moscow, Chiteni/July 14 (Agencies): Taoba ita Moscow nung miktat lenirtem anema nokdakba sülen Russia nung maneni külemi tenzüktsü asoshi Wagner mercenaries nem maongka agütsü, ta Russia Tir Vladimir Putin-i ashi.

Russia nung osangkaket Kommersant ajanga Brehostibarnü sensaksemba mapang Putin-i ashiba agi, taoba ita Wagner sepaitemi mapang tatsüka Russia mitkar lenir anema nokdaker anogo pongu sülen Wagner sepai 30 shi aser iba telok tentetsang Yevgeny Prigozhin den senden ka amendang pai maongka ishika agütsüba rongnung ibai ka lir.

Putin-i maongka agütsüba kübok, senyong raraba sepaitem ya tang parnok commander kübok tenzüktsü, shiba osangkaket ajanga "Grey Hair" ta dang shia lir. Kommersant-i ashiba agi,

Wagner sepai 35 aser Prigozhin den Kremlin nung senden amenba aser par commander kübok ita 16 alitsü densema tarutsü asoshi parnok nem maongka agütsüba indang Putin-i jembia.

"Parnok ajak tesem ka nung adenshia maneni parnok mapa inyakla," ta Kommersant dang Putin-i ashi.

"Aser kecha temelenshi melila. Parnok ya kasa nisungi anir lila, shiba teti parnok indang commander chichiba ama aru."

Putin ya army indang commander-in-chief asünung, mercenary force ya Russian military nung alitsü ashir amai ajitetet, saka pai ibaji jangjabo mashi.

"Ni aji ashidang parnok aikati tekolak angemten. Ajisüaka Prigozhin-i memolung," ta Putin-i ashi.

"Ni jembiba anga ataba sülen, 'Nong, parnoki iba ama telemtetba nung molungsoa manidaktsü' ta Prigozhin-i

langzü," ta Russia tiri ashi.

Russia lenirtem private military organisation ka nung metaloker lia aru, shirnok Russian law agi mawajemtetli lia aru, ta Putin-i Kommersant dang indang-indanga mesüi nanzük.

Wagner tang ama alitsü tamakoktsü, ta pai osangkaket dang ashi.

"Wagner mali. Private military organisations atema ozüng mali. Ibaji mali," ta Putin-i Kommersant dang ashi.

Ukraine anüdokleni Russian army tem aoba nung Wagner sepaitemi tongti shilem agi aser ita ishika rarar May ita Bakhmut yimti agiba nunga parnok shilem tuluba liasü.

Ajisüaka Bakhmut asoshi raraba tongtipang mapang par sepaitem meyari aser par telok nem artillery shells aser danga injang-bomb agütsüba ajem, ta Prigozhin-i mapang shia Russia indang mitkar tanishirtem aija aru.

MULUNGNEN O



Asür NANGSHIKABA
15/07/1978 - 05/07/2023

Onok mangyim tejashi nung aliba mapang temeim sayuba aser teyari balala agütsüba atema Asür NANGSHIKABA HAV. (OPR) of 1 NAP Chümoukedima kinunger temi pelaba lemsateper. Pa asüba sülen onok den molung süngzüktsü o jembiba, tenla agütsüba aser asükhü lemsatepba ajanga onok temolung kanga anisüngzükogo.

Onoki kija shia tenüng teta pelaba ashitsü tamakoktsü süaka, pa shirangba mapang nungi tasünü tashi nenoki maneni sarasademtsüba aser yariba ozü molung nungi kodanga maidoktsü aser nenok ajak dang pelaba lemsateper. Asen Tulusang Tsüngremi nenok ajak moajangma.

- Temeim Kinungertem.

Menungra Bilemteter

Tatem maka teti anisüngzükdaki orr küm ka abensar. Onoki na menungraseta sarasadema amonger. Tanü na onok den meliaka nü menürem jakden aser ajemalu, shisatsü teti onok nükla dangi arur aser nü temoatsü aküm nung onok alir aser onok temulung anisüngzükter.

Temeim Chirurtem,
Semchirtem, kinungertem.



ASÜR MR. LUINSANGBA (Khar)
(April 1922-15 July 2022)

Office of the
Riongsanger Putu Menden, Kangtsüng
TAKOK NÜNGSANG AGÜTSÜR

Shisaluyim nung ajemalua aser Tsüngrem akümstüba nentaknentaka azüngla Wb. Bendangmar lmsong aser Wt.Sentimenla Jamir na jala Kr. Imnajungla-i NPSC ajanga agiba tatidang Common Educational Services Examination, 2023 Botany subject nung Post Graduate Teacher (Rank 4) nguteta sensosanger aser yimer yimsangertem tangi konang tulu bener arutsü nung tenüngsang tulu agütsür.

Shisarajemer tajung wadang tasen nung ayaoka inyakdang na temoatsü nung azükarua aliba den külemi nungdakba nübor aser sensosanger asoshi len sayur tajung ka sūdakangni ta Tsüngrem dang temoatsü jazüktsür.

Sd/-
M. Mar Lemtur
Chairman

Sd/-
Noklennükshi
Secretary

Ita aika o agi mitkar forces yagi alakteta shilem lenirtem aija aruba sülen agiba mali, ta ashir.

Wagner sepaitem Ukraine nungi Russia-i aita June 24 nü linük south tsütsü Rostov-on-Don yimti agi aseer unit kar Moscow tsütsüi ao.

Ajisüaka parnok Belarus nung alits aser parnok anema ken o balala benoka aliba mebushitsü ta tezüngzüktep agiba ajanga Prigozhin-i ghonda 24 tsüingta par sepaitem Moscow leni aoba anenogo ta sangdonga Wagner mutiny yangji tembang.

Tang Prigozhin ya kong aliar memetet aser taoba hopta tashi par sepaitemi Belarus nung oa alitsü maongka agütsüba ano magi liasü.

Wagner-i Russia indang regular armed forces nem nok-nü tulu aser tesashi meyipa agütsüba maparen tatemleni arur, ta Russia defence ministry ajanga Bodhbarnü shia liasü, aser Pentagon-ia Ukraine nung iba mercenary

forces yagi alakteta shilem agiba mali, ta ashir.

"Tangbo Ukraine nung combat operation yaria Wagner sepaitemi shilem agiba onoki mangur," ta Pentagon odongtar Air Force Brigadier General Patrick Ryder-i Brehostibarnü ashi.

Washington, DC nung amenoka aliba Institute for the Study of War (ISW) ajanga Brehostibarnü ashiba agi, geolocated video footage nung Wagner sepaitem ya Voronezh region nung Russia indang M4 motorway nung convoy aoba amai sayur aser ibai field camps tem nung aliba Russia-i amokbanga aliba Ukraine tsütsüi tanaben yoker amai lir.

Russian military blogger kati ashiba agi, iba video nung convoy ya Russian police temi meiner ao aser Belarusian licence plates aliba bus tem densema lir, anungji convoy atongtsüba tesem sayur, ta ISW ajanga ashi.

Revenant FC-i Mokokchung Friday League 35+ asemben buba benogo



Mokokchung Friday League 35+ champion Revenant FC den tetushi tesemdang... Mokokchung ADC, Chumlamo Humtsoe aser tayongertem senpet agütsüba sentong temer külen tangokba noksa nung angur. Mokokchung, 14th July, 2023.

Mokokchung, 14th July (TYO): Mokokchung Friday League 35+ Season 3 taküm April ita nungi tenzüka asaya-a arur tanü tatabangbuba match yangi Imkongmeren Sports Complex, Mokokchung nung asayaogo aser MFL Season 3-a Revenant FC-isa benogo aser New Ecclesia pur tanbuba jenjang liasü.

MFL Season 1 aser Season 2-a Revenant FC-isa bena lir, anungji, tang Season 3 bubajia parnokisa abener asünung MFL Trophy ji teti atema parnok meyong kümogo.

Champion team nem trophy den kulikaket aser senpet sen

15,000/- (fifteen thousand) aser runner up nem kuli kakat den sen 10,000/- (ten thousand) agütsüogo.

Nija/juri senpet (i) best goalkeeper - Talilepba (Revenant FC), (ii) best defender - Takosangba (Trebuchet FC), (iii) highest scorer - Revenant FC nungi Moakaba (Pai 14 goals yok), (iv) man of the tournament - Moatemsü (New Ecclesia), (v) fair play award - Terokroker FC aser (vi) oldest player - Wasang FC nungi Akangmeren (56 years) parnokki agizük.

Mokokchung Friday League nung ya team 6 - Revenant FC,

New Ecclesia, Senso FC, Wasang FC, Terokroker FC aser Trebuchet FC-i shilem agia liasü.

MFL tembangbuba asaya den senpet agütsüba sentong nung tetushi tesemdang Mokokchung ADC, Chumlamo Humtsoe-i jembidang, saisapong meimertem lungjemmer iba ama asayamung ayongba ajanga temang anema aliba dang masü medemer tasen yimtepsü maangka angur, aser iba mapa ajanga lanurtem nem tajungshiba agütsür. Aji oda, asentzü sentokba nungji tajangzük aika sentaka lir, anungji, ibai metitemi aotsü ayongzük.

T.Lanu Imchen NESKF nung VP shim

Dimapur, July 14 (TYO) : All Nagaland Karate-Do Association (ANKA) nung working president Wb.T.Lanu Imchen tawa July 07, 2023 nü Shillong nung North East Sports Karate Federation (NESKF) lokti senden alidang NESKF nung vice president shimogo.



Nagaland nungi Northeast nung shilem tajung agitetsüsa NESKF nung Wb.T.Lanu Imcheni jenjang tajung ngutetba takok asoshi pa nem tenüngsang agütsür aser ano tarutsü nunga pa leniba nung maneni takok tulu

ngudakjangma ta ANKA sangdong ka ajanga metetdaksüogo.

Rongrong paitoktsü mechi... (Tapak 7 nungi...)

Zuma tanaben tepuokdaki yoktsü totuyuba agütsüsü asü mesüra medical parole nung pai mapang indokba ya tepuokdak alir ama züngshitsü asü masüar Department of Corrections ajanga ano kecha shia mali. South Africa nung osangtem ajanga ashiba agi, arishi küm 81 tain taoba tir ya Russia nung temang anepalua amunger.

Sepaitem ya linük north tsütsü Limpopo aser Mpumalanga province, easter tsütsü KwaZulu-Natal province aser central tsütsü Free State province tem nung yoka lir. Truck nung lendong agütsüba asoshi telangzuba agütsüba nung army temi police yaritsü, ta South African Department of Defence

ajanga ashi.

Limpopo, Mpumalanga aser KwaZulu-Natal province tem nung Deobarnü nungi tenzüka truck 21 rongtsüogo, ta Cele-i ashi. Truck rongtsüba ya Deobarnü tenzük, koba 2021 azüdokshi tenzükür küm ana ajungba anogo liasü.

"Kechi nukjidong nung südir stüaka, linük nung ozüng amshirtem saksalema lir aser lendong tali ataloktsü aliba nungi nokdangtsü meranga inyaker saka ano kasa mapang lenmang nung lendong agütsürtem bushir," ta Cele-i ashi. Truck tem rongdoktsüba dak sendakba nung keddangsur temi nisung asüba mesüra kanga sashia yiruba osangbo sangdonga mali.

45 buba Inter District & State Open Badminton asayamung nung Peren overall champion liasü

Kohima, Chiteni/July 14 (TYO): Kohima nung agiba 45 buba Inter District & State Open Badminton Championship aser Nagaland Badminton Association (NBA) Golden Jubilee Commemoration nung Peren district overall champion liasü.

Iba asayamung ya July 10 nü tenzüka NLA Stadium nung sentong ka agia liasü aser category 25 nung tetoktepba lia Hokulbarnü Indoor Badminton Stadium nung tembang, kong Deputy Chief Minister TR Zeliang tesemdang tongti aser Advisor, Youth Resources & Sports, S. Keoshu Yimkhiung alakteta jaoker ama dena liasü.

Iba tournament nung district 15 nungi asayar aser keddangsur 300 dak tema aser department ana nungi shilem agia liasü.

Iba sentong nung jembidang Dy. CM, TR Zeliang-i ashiba agi, badminton ya asaya rongnung jangratemtsü aketba aser kanga kera temang arakzuba saisapong ka lir aser iba asaya yagi alima nung asayar aser terepranger million aika atsür arur.

Yimyak yimsüngtem nung toktepba nungi tenzüka international sapang tashinung badminton ajanga asayartem lungjemdakja pei sempet, tejangraba aser saisapong yimyatem sayur, ta pai ashi.

Temang anema alitsü atema nisung aikati badminton ya asayar aser azünga aliba mapanga asayar, aser badminton ya arishi küm mesüra temang yimya telemsa kecha tebensa makai ajak atema lir, ta pai ashi. Pei tejangraba, temolungtetba

asayartem dang temaba jenjang nung nukjidong yur tajungtiba nung national aser international level nung toktepsü ayongzuka liasü.

Deputy Chief Minister-i lanur asayartem dang temaba jenjang nung nukjidong yur tajungtiba nung national aser international level nung toktepsü ayongzuka liasü.

"Nü temang anema, chiyongtsü shidak achiba aser temang asoshi timtem agütsüba chiyongtsütem nungi pila aliba den teti training aser exercise shidak agiba ajanga takok angutsü," ta pai ashi.

NBA indang Golden Jubilee nungtem nung iba sentong ayongzükba atema pai tenüngsang agütsü aser state nung badminton temaba jenjangi ajungkettsü asoshi Association ajanga shilem tulu agiogo, ta Zeliang-i ashi aser NBA nung mezümpur aser tang aliba lenirtemi anibelem mesasai inyakba atema pelaba lemsatapa liasü.

Sl. No	Event	Winners		Runners-Up	
		Players' Name	District	Players Name	District
1	Under- 13 Boys Doubles	HOTO H KINIMI	ZUNHEBOTO	KHRIEMZO LINYU	DIMAPUR
		MUGHAKIVI T ZHIMO	ZUNHEBOTO	VATACHU POCHURY	DIMAPUR
2	Under- 13 Girls Doubles	Wadanglemla	Mokokchung	Meyisen Longkumer	Dimapur
		Yalemjungla	Mokokchung	Wangshirenla Imchen	Dimapur
3	Under- 13 Boys Singles	Imchalong Lemtur	Mokokchung	Mughakivi T Zhimo	Zunheboto
		Yalemjungla	Mokokchung	Anon W Konyak	Mon
4	Under- 11 Girls Singles	Themnunmoi	Peren	Mulongnenla	Mokokchung
		Thoku Kiho	Zunheboto	Supongnukshi	Mokokchung
6	Under- 11 Girls Doubles	Beweu Lasuh	Chumoukedima	Molongnenla	Mokokchung
		Livana Yeptho	Chumoukedima	Wapangienla	Mokokchung
7	Under- 11 Boys Doubles	Thoku Kiho	Zunheboto	Moatangit Tzudir	Mokokchung
		Kinsho H Kinimi	Zunheboto	Lenjener Tzudir	Mokokchung
8	Under- 9 Boys Singles	Moatangit Tzudir	Mokokchung	Lenjener Tzudir	Mokokchung

Advisor Yimkhiung-i badminton asayaba ajanga temang nung tajangzük anguba indang jembidang, iba asaya yagi tashi agütsür aser temolungjangi mapa shidak inyaker, anibelemba ajemdaktsür aser tekolok tekeraba kumdaktsür, ta ashi.

Pai saisapong jangraba lanur aser taintem dang maneni badminton temaba jenjangi ajungkettsü nukjidong nung shilem agitsü ayongzuka liasü. NBA vice president Lemjan Phom menden sür iba sentong ya Pastor, Peraciezie Baptist Church Kohima, Rev. Kevichalie Metha-i sarasadema tenzük aser Anyap-i temeja ken ka tena lokti ayongzük.

Iba sentong nung NBA nung taoba tir aser keddangsur aser coach nema konang tetushi agüja liasü aser NBA tatong tir aser Badminton Association of India nungi Dr Watizulu Süzümeren-i melepzüng o jembia liasü.

Iba asayamung nung category balala nung takok angurtem yamai alitsü:

Sl. No	Event	Winners		Runners-Up	
		Players' Name	District	Players Name	District
1	Seniors Mixed Doubles	HITTO SWU	NIULAND	VIKEHIETUO KENSE	KOHIMA
		SHEKHOTOLU PURO	DIMAPUR	EKUMYALA CHANGKIRI	KOHIMA
2	Juniors (Under-19) Mixed Doubles	Sewang Konyak	Dimapur	Abo Konyak	Mon
		Kipangwala Longkumer	Dimapur	A. Ponlih	Mon
3	Under- 19 Girls Doubles	Arenchila	Mokokchung	Lhitiu Lasuh	Phek
		Sunepbenla T. Imchen	Mokokchung	Waweu Kapfo	Phek
4	Under- 19 Boys Doubles	Sewang Konyak	Dimapur	Renchamo Yanthan	Kohima
		Wapangmeren A Jamir	Mokokchung	Vito Chisi	Zunheboto
5	Under - 19 Girls Singles	Watsungla	Mokokchung	Sunepbenla T Imchen	Mokokchung
6	Under-19 Boys Singles	Sewang Konyak	Dimapur	Wapangmeren A Jamir	Mokokchung
7	Under-17 Girls Doubles	Imlikumla	Mokokchung	Hon-e	Longleng
		Kipangwala	Mokokchung	Theila	Longleng
8	Under- 17Boys Doubles	Alichang	Mokokchung	Kibangheu	Peren
		Sentiyatet	Mokokchung	Mithuithunbo	Peren
9	Under - 17 Girls Singles	A. Ponlih	Mon	Imlikumla	Mokokchung
10	Under -17 Boys Singles	Esibe	Peren	Sentiyatet	Mokokchung
11	Under- 15 Girls Singles	Nancy	Longleng	Moimei B	Longleng
12	Under - 15 Boys Singles	Heloka Swu	Niuland	Titoka Shohe	Zunheboto
13	Under- 15 Boys Doubles	Manpai	Mon	Wabongsen	Mokokchung
		Nokpon	Mon	Wacha	Mokokchung

Sl. No	Event	Winners		Runners-Up	
		Players' Name	District	Players Name	District
1	Men's Singles	H. LEIHONG	MON	RIKU KHAPE	DIMAPUR
		KONYAK			
Women's Singles		Mepulila Jamir	Mokokchung	Shekhotolu Puro	DIMAPUR
2	Men's Doubles	Peramrisi Zeliang	Peren	Hitto Swu	Niuland
		Teichang Herie	Peren	Vikehituo Kense	Kohima
3	Women's Doubles	Prathana Thapa	Kohima	Bendangnaro	Nagaland Police
		Uma Tamang	Nagaland Police	EKumyala Changkiri	Kohima

Li Ning 45th Inter District & State Open Badminton Championship, 2023

TEAM CHAMPIONSHIP

Winners		Runners-Up	
4	Junior Girls (U-19) Team	Mokokchung	Longleng
5	Junior Boys (U-19) Team	Peren	Phek
6	Men's Team	Peren	Dimapur
7	Women's Team	Dimapur	Mokokchung
8	Overall Team Champion	Peren	

BILEMDANGANG
"Timtem melira taküm nung tetetzü maka."